

皇清經解續編卷五十九

南菁書院

禮記訓義擇言一

婺源江永慎修著

曲禮上

很毋求勝分毋求多

草廬吳氏引鄭氏曰求多爲傷平也

案鄭氏爲傷平也總解毋求勝毋求多蓋與人鬪爭必求勝亦是傷平吳氏引舊注增求多二字專釋下一句非也

立如齊

案齊嚴敬貌如齊者正立自定不跛不倚儀禮所謂疑立是也

禮不妄說人不辭費

朱子云禮有常度不可爲媚以求說於人辭達則止不貴於多

案當從朱子說不妄說人若孟子不與王驪言不辭費若冠

禮祝辭昏禮戒女及主賓之辭祝嘏之辭皆不尙多也

禮不踰節不侵侮不好狎

案踰節則招辱未確當云踰節則無度

道德仁義非禮不成教訓正俗非禮不備

案其由者爲道同得者爲德仁與義其大目也非禮則仁義無節文而道德亦爲虛位此論其理如此未論人之所以修身下文亦無分承之意

宦學事師非禮不親

鄭注宦仕也疏引熊氏云宦謂學仕宦之事學謂習六藝左傳趙盾見靈輒餓問之

云宦三年矣服虔云宦學也是學職事爲宦也吳氏云宦學猶言遊學也有事師之禮然後師友之情親

案注疏分仕與學爲二事陳氏集說從之未當當從吳氏之

說

班朝治軍蒞官行法非禮威嚴不行

案班朝治軍蒞官行法孔疏陳氏皆分爲四事吳氏謂班朝治軍蒞官三者各有其法似皆未安愚謂二句分三事蒞官行法言當官而行法令也

是故聖人作爲禮以教人

案樂記聖人作爲父子君臣以爲紀綱與此句文勢正相似宜作一句讀作字勿絕句

大上貴德其次務施報禮尙往來

孔疏云三皇五帝時淳厚不尙往來之禮所貴在德德主

施但施而不希其反三王之時施則望報以爲常事故其禮主尙往來

案古初人心淳厚渾忘施報之名後王制禮則因人情之常施報務其相稱是以有交際往來之禮往不來來不往有施

而無報皆非禮也孔疏得之但不當以三皇五帝三王時爲限耳

百年曰期頤

呂氏云人生以百年爲期故曰期朱子曰期當音居宜反論語期可已矣與暮字同周而之義也期

謂百年已周頤謂養而已期如上句幼弱耄悼等字頤如上句學冠不刑等字

案當從朱子說

自稱曰老夫於其國則稱名

呂氏曰老夫長老之稱己國稱名父母之邦不敢以尊者自居也朱

氏軾云於他國言老夫不自有其貴也本國稱名并不自稱老也

案二說當兼存之

夫爲人子者三賜不及車馬

鄭注三賜三命也凡仕者一命而受爵再命而受衣服三命而受車

馬車馬而身所以尊者備矣卿大夫士之子不受不敢以成尊比踰於父天子諸侯之子不受自卑遠於君朱子云左氏傳魯叔孫豹聘於王王賜之路豹以上卿無路而不敢乘疑此不及車馬亦謂受之而不敢用耳若天子之賜又爵秩所

當得豈容獨
辭而不受耶

案此言爲人子者父在時三命爲大夫而父未得爵命不敢
受尊物以踰於父也君雖賜之臣必固辭之如固辭不獲命
亦受之而弗敢乘辭者禮之經也受而不用者禮之權也此
經但論人子孝敬不敢踰父之初心言經而未及權是以第
云不及車馬

故州閭鄉黨稱其孝也兄弟親戚稱其慈也僚友稱其弟也執
友稱其仁也交遊稱其信也

案三賜不及車馬非實有孝敬之心者不能卽此一事而孝
行已著諸德亦皆備矣州閭鄉黨非親非友故以稱孝屬之

所遊必有常所習必有業

陳氏云遊有常身不他往
也習有業身不他用也

案陳氏說簡而當

恆言不稱老

案孔疏引或說云子若自稱老父母則甚老感動其心此說得之陳氏云古人所以斑衣娛戲者欲安父母之心也此說亦善

祭祀不爲尸

鄭注尸尊者之處爲其失子道然則尸卜筮無父者

案祭者子行安能必得無父者但非主祭者之子則可矣

父母存不許友以死

鄭注死爲報仇讎呂氏云許者許其託先儒謂許報仇雖父母沒亦不可患難相死

兄弟之道也朋友以義相成患難之事無相及戰國游俠以氣相許結私交報仇怨君子謂之不義也

案不許友以死坊記所謂父母在不敢有其身也朋友亦有患難相死之道非謂若聶政之爲謂友有危難忘身救之或

冒險脫友於阨如李篤之匿張儉或犯顏雪友之冤如左儒之爭杜伯固有激於義而爲之者矣父母在恐危親故不許舊說以爲報仇者固非呂氏曲避報仇之說謂許者許其託然經文曰不許友以死不曰不許友於託則此說亦非確訓負劍辟咎詔之

案古人常帶劍於脅亦或帶之於背拔劍則俯身而出之如荆軻傳秦王劍長不能拔左右呼曰王負劍此負劍或卽荆軻傳之負劍謂長者俯身與之語如負劍之狀也如此則負劍與辟咎相對負劍俯其身辟咎辟其口或亦可通

毋踏席

鄭注升席必由下也孔疏曰將就坐當從下而升當已

位上不發初從上也玉藻不由前爲躡席與此別朱子云此是衆人共坐一席旣云當已位上卽須立於席後乃得當已位上蓋以前爲上後爲下也正與玉藻義同鄉飲乃是

特設賓席一人之位故以西爲上而自席下之中升而卽席
與此異也陳氏云踏猶躡也玉藻曰登席不由前爲躡席是
登席當由前也

案注疏之誤朱子正之陳氏亦引玉藻乃謂登席當由前與
朱立於席後之說相反蓋玉藻登席不由前爲躡席爲字本
讀去聲爲躡席者釋上所以不由前之故也陳氏以如字讀
之謂不由前卽爲躡席是以登席當由前其說誤矣

客至於寢門則主人請入爲席然後出迎客客固辭主人肅客
而入

鄭注爲猶敷也固辭又讓
先入肅進也進客謂道之

案主人復出迎客不言與客讓入客何爲固辭且主人道客
亦宜也何必待客固辭而後入士相見禮主人出迎客一揖
卽入無讓入固辭之文竊疑主人請入爲席然後出迎客者

主人道其意於客也其辭若曰某當先入爲席敬逆吾子云爾客固辭者辭其請入爲席也主人因客固辭而止遂肅客入實未嘗入爲席也先儒以固辭爲又讓先入者誤矣然則士相見何以無請入爲席之禮曰彼是初見之客授贄卽出堂上不坐故不爲席此是飲食或講說之客故有請入爲席之儀節也下章主人跪正席正爲先時實未嘗入爲席故又有此儀節也

拾級聚足

鄭注拾當爲涉聲之誤也涉等聚足者謂前足躡一等後足從之併呂氏讀拾其劫反云拾更也拾級左

右足更上也

案拾級當從舊說呂氏謂左右足更上如此則不得聚足矣左右足更上者謂之厯階栗階有急事升降則爲之喪禮略

威儀謂之散等平時賓主升階當不栗階散等呂說誤矣

凡爲長者糞之禮必加帚於箕上以袂拘而退其塵不及長者案爲長者糞之禮詳見弟子職婦前有灑婦固無塵以袂拘而退者敬也非真以袂障塵也加帚於箕上自是初往時弟子職執箕膺搗厥中有帚可證若婦時箕倚於戶側俟婦訖然後以箕收之非執箕以婦也此節當從舊說

奉席如橋衡

鄭注橫奉之令左昂右低如有首尾然橋井上榘榘朱氏云按陳注如橋之高如衡之平較舊注直

截

案陳注如橋之高如衡之平雖若直截實俗訓詁也橋高出水上奉席豈能如之當從舊注榘榘之說榘榘見莊子

席南鄉北鄉以西方爲上東鄉西鄉以南方爲上

鄭注上謂席端也布席無

常坐在陽則尙左坐在陰則尙右疏曰此謂平常布席如此
禮席不然朱子曰東鄉南鄉之席皆尙右西鄉北鄉之席皆
尙左

案古人常坐在室中此文大約就室中之席言之南北鄉以
西方爲上者統於奧也東西鄉以南方爲上者統於戶牖與
堂也若堂上南鄉之席皆以東爲上飲燕射食皆然惟神席
尙右以西爲上故昏禮醴賓徹几改筵明不以西爲上也鄉
飲鄉射賓若有尊者席於賓東此則以西爲上蓋統於戶牖
閒之酒尊明不與賓同東上取義又異也

就屢跪而舉之屏於側鄉長者而屢跪而遷屢俯而納屨

朱子云注

云長者送之恐非是但恐雖降階出戶猶鄉長者不敢背耳

案就屢跪而舉之屏於側是解屨後未上堂時事鄉長者而

屨是既退下階時事不可以此句連上句也跪而遷屨是將納屨時稍移近前非申言舉而屏也此節只當從孔疏與朱子說更無別辭

嫂叔不通問

鄭注通問謂相稱謝也方氏云若問安問疾之類陳氏云無問遺之往來也朱氏云謂不相親問答也

案諸說皆可通朱氏說爲優有當問者使人答之可也

女子許嫁纓

案此纓俟昏禮之夕壻親脫之

凡進食之禮左殽右馔食居人之左羹居人之右膾炙處外醯醬處內葱蒜處末酒漿處右以脯脩置者左胸右末

案以鄭注釋之食羹最近人膾炙醯醬在殽馔之外內葱蒜

處醯醬之左酒漿處羹之右則諸物當列爲四行第一行左食右羹而酒漿在羹之右第二行爲醯醬而葱醢在醯醬之左第三行左穀右醢第四行爲膾炙又醯醬一本作醢醬孔疏有二說若是二物則醬在右醢在左如昏禮公食大夫禮之設今本作醢醬則是以醢和醬共爲一物疏又謂鄭注葱醢云處醢醬之左則醢醬一物爲勝脯脩之設注無明文孔疏謂處酒左以燥爲陽也案酒左是羹何得於此置脯脩此則孔疏之誤當是設於酒漿之右耳

祭食祭所先進穀之序徧祭之

案公食禮先設正饌訖賓祭正饌後設加饌賓又祭加饌其祭如所設之序而設饌惟有二次此記尋常賓客飲食之禮

主人與之共食雖未知設饌幾次要必設訖而後祭非進一
穀祭一穀也

共飯不澤手

吳氏云飯扶晚切下搏飯放飯揚飯飯黍並同又云此節五飯字皆當作上聲讀飯謂食之也

案陸氏釋文云依字書食旁作卞扶萬反食旁作反符晚反
二字不同今則混而一之愚謂此節五飯字惟放飯飯黍二
飯字音上聲若共飯搏飯揚飯三飯字當音扶萬切指所食
之飯而吳氏皆讀上聲誤矣

毋咤食

鄭注嫌薄之孔疏云咤謂以舌口中作聲似嫌主人之食也陳氏云謂當食而叱咤毋咤恐似於氣之怒也

案陳說非是當從注疏

毋固獲

吳氏云固獲二字一意謂固必而取得之也

案當從吳氏說

飯黍毋以箸

孔疏云飯黍毋用箸當用匕故少牢云廩人漑匕與敦注云匕所以匕黍稷是也

案此句鄭氏無明釋上文共飯不澤手注云禮飯以手孔疏云古之禮飯不用箸但用手然則飯黍者之毋以箸亦謂不以箸而以手也下文羹之有菜者用挾鄭注云挾猶箸也然則古人以箸食羹耳此疏引少牢謂當用匕與前禮飯以手相抵脣少牢之匕黍稷謂從爨匕出入敦非謂以匕食黍稷也弟子職云左執虛豆右執挾杞周旋而貳亦是以杞盛飯如今人之飯匙非以杞食飯也許慎說文釋箸爲飯敲蓋後世始以箸食飯耳又案鄭氏通毋揚飯飯黍毋以箸毋嚙羹三句總注云亦嫌欲疾也以此推之古人之箸卽弟子職之挾杞如今人之飯匙所以盛飯入食器飯黍以箸者是欲

食之急於桮杌中食飯也至漢初張良借箸陳事以箸代筯
始若今人之箸若紂之象箸當是以象飾桮杌耳

毋嚙羹

鄭注亦嫌欲疾也嚙爲不嚼菜

案羹無菜者不用桮則亦有以口取食者矣當從鄭注

侍飲於長者酒進則起拜受於尊所

鄭注降席拜受敬也燕飲之禮鄉尊

案孔疏以尊所爲陳尊之處廣引燕射鄉飲設尊處所謂此

言拜受於尊所者當是燕禮而燕禮不云拜受於尊所鄉飲

亦無此語疑是文不具又引何允云尊者主人也拜者在尊

所對主人也降席下奠爵再拜稽首嚮尊謂主人尊也則尊

字爲尊卑之尊二說當以前說爲是呂氏謂禮飲與侍飲異

亦是也

餽餘不祭父不祭子夫不祭妻朱子云案禮君賜腥則熟而薦之以爲榮君賜熟食則恐是餽

餘故不以祭妻子雖卑於已然既沒則以神道接之故亦不以祭也

案此經固當斷從朱子說而陳氏集說兼存祭食之說與注

疏小異亦可玩也

御同於長者雖貳不辭鄭注謂侍食於長者饌宜與之同也貳謂重殺膳也解之爲長者嫌

案貳鄭氏以爲重殺膳固當從之愚疑尙有二說一謂貳益之也如易貳用缶酒正大祭三貳弟子職周旋而貳之貳謂食物盡而主人復益之有長者在則已不辭其益一謂貳副也如左傳貳圉之貳長者之副也有長者在唯長者一人辭已雖次尊亦不辭貳猶不辭其下可知下文偶坐不辭謂二人同尊卑者也姑記所疑俟知者擇之